

## Success per tiraduras sursilvanas

A Domat ha gì lieu il campinadi grischun cun l'arma da 50 meters. Ad Igis-Landquart è stà il di da giuvenils e da giuvenils. Sajettà precis han cunzunt Annina Tomaschett e Chiara Weishaupt.

Gion Nutegn Stgier/FMR

Al campinadi grischun a Domat èn tiradurs e tiraduras sa mussads da lur meglra vart. Tar l'elita en la categoria en venter ha *Lars Färber* (Favugn) tratg cun 626,8 puncts in nov record grischun e gudagnà la concorrenza. L'antierur commember dal team svizzer ha meglierà ses agen record chantunal per 1,3 puncts. *Annina Tomaschett* (Trun), la campionesa grischuna 2021 e commembra dal cader naziunal, ha terminà il tir cun en tut 60 culps sin plaz dus. Cumpletà il podest ha lura *Cornelia Valentin* (Cuira). En la concorrenza en venter dals juniors sa numna la victura *Martina Herrli* (Tavau). Sco Färber ha er la matta e commembra dal cader svizzer tratg cun 612,2 puncts in nov record grischun. Victur da la categoria veterans en venter è vegnì *Corsin Derungs* (Camuns) cun in resultat da 614,9 puncts. *Marie-Louise Degonda* (Cumpadials), ch'è stada gia pliras giadas campionesa grischuna, è vegnida segunda. E cumpletà il podest ed il success sursilvan ha *Placi Caviezel* (Camuns).

## Plaz duas per Chiara Weishaupt

Tar il di da giuvenils e giuvenils arma da 50 meters ad Igis-Landquart ha *Chiara Weishaupt* (Degen) tratg precis. Ella è vegnida segunda en la disciplina roiala da trais posiziuns. Gudagnà la concorrenza ha *Enrica Caluori* (Razén) cun in ferm resultat da 561 puncts. *Mirco Caduff* (Igis-Landquart) è vegnì sin plaz in en la categoria U17-U21 e quai cun in resultat da 395,5 puncts. *Linus Maissen* (Alvagni) ha gudagnà la medaglia d'argient en la categoria U13-U15. La concorrenza da gruppas han dominà las gruppas da Domat, Landquart, la Surselva, Poschiavo e Tusaun.